

CANZUNA

DI VITA, DI MORTI, D'AMURI

*

Petru

siddu nasci
masculu

ti chiamu
figghiu.

*

Li palori

sciddicanu ammutta ammutta
ntronanu lu balataru
si ncantanu 'n-punta di la lingua

scugnanu

tinti
scrusci
mpaiati.

*

La prima
botta
di Sciloccu,

Marzu
è già staciuni.

*

Vita	Morti.
Beni	Mali.
Diu	Omu.

E muntarozzi d'aschi
bummuli di lastimi mi vuscu
siddu appena m'allanzu
a 'mmanziri ssi nsulti.

*

Aprili mutriusu gnuttica
stuccati azzenti
di sì e di no.

*

Nna li jidita di na manu
fazzu lu paru e ziparu

grattu li facci niuri
cu lu bianchettu

e cui acchiana acchiana
mi ni futtu

e vinciu.

*

E parru.
Senza fila.
E mi ni mpipu.
Chì ssa sputazza
a mia mi fa campari
e arrunzu li bulletti nna lu stipu.

*

Na vita
tutta na vita
na vita sana
finu a l'ultimu

cu ssa testa.

Oh, cu ssa testa!

*

Com'è chi addivintai na fitinzia

un nturdu
un nuvidduni
un sceccu

na fezza vili di tussi e catarru

unu
chi fa sulu
strunzati?

*

Mi spirciava di canciari rigistru
di ncapizzari crocchiuli di luci
di sulcari cu vommaru d'olivu
la storia firniciusa di sta terra.

*

Tu
occhi a bannidduzza

masciddi a valliri
e na trumma ...

avi assai nuatri
chi nun n'avemu scrittu mai.

*

Ci po sulu lu sangu!

Ma no pi forza stiornu;
dumani.

*

A st'ura

su' stranii, celi
ciauri
quarteri

e scogniti, facci
palori
fatti.

*

Battaria, di mari
e munti

e tempi

addiddi
cu cazzusa
pasta a furnu
miluni.

Cenzimentu, di varchi
surci
errami e scintini

a senza d'iddi
agghiri cca
p'arrinesciri.

*

Lu munnu
a quattru roti

strati strati
sugnu lu sulu
pedi piduzzi

mi squatra

m'arrassa

mi bummià.

!

*

Luna china stanotti.

Putissiti parrari d'amuri!

(a la ntrasatta
nun campu chiù senza ssu turrucu
scarfatu
chi m'allavanca)

*

Ma chi cancia?

*

Tu si' armata di zotta
e di zuccaru
e di battisimu.

Però ... accura!
Nun è babbu
addumisticari sta fera.

*

La diffirenza?

Mischinu mia!

*

Sudu.

Arrè ssa porta chiusa.

Aspittannu.

*

Ammeri l'autu
l'acqua
acchiana
limpia.

E sauta
ridi
baccaria.

Chi sorta di ciumi è chistu?

E chi spaziu?

E chi tempu?

Na scoppula
chi ti sagna la vita.

*

No pi cosa,
ma lu roggiu accabbau

e la festa
macari.

*

Tu e to mogghi
ncapu a lu marciapedi
mmistuti di na machina
chi ...
nun si capisci comu.

Puntu.

*

Canziati, Morti
nun mi ni fai sangu!